

靖節先生集

外舅陶文毅公以道光己亥夏卒於位。秋，夫人奉喪歸。以公注靖節先生集十卷，年譜攷異二卷，授余曰：公於從政之暇，不知幾寒暑而成是書。今公歸道山，子且幼，能成公志者必汝。其毋忘公意乎。

詒樸

謹受命。校讐數過，槧於金陵。既卒業，因志其

緣起於簡端。道光庚子秋九月，湘潭周詒樸謹記。

卷首

例言

欽定四庫全書提要

諸本序錄

誅傳

附錄雜識

卷之一

詩四言

卷之二

詩五言

卷之三

詩五言

卷之四

詩五言

卷之五

賦辭

卷之六

記傳述贊

卷之七

疏祭文

卷之八

五孝傳

卷之九并叙

集聖賢羣輔錄上 一名四八目

卷之十

集聖賢羣輔錄下

諸家評陶彙集

卷末

靖節先生年譜攷異上

靖節先生年譜攷異下

例言

是集據陽休之序錄及晁公武讀書志梁昭明所編正集原止七卷又錄一卷爲八卷其五孝傳四八目則休之所增當以別於正集次爲三卷合成十卷是陽本也今諸本以五孝傳編於記傳之後疏祭文之前則旣違蕭編亦乖陽錄矣故特離而出之庶昭明舊第猶可想像而得焉

是集宋莒公本今不可見世所傳者惟湯文清李公煥何孟春三家最著湯止注詩頗爲簡要李何稍繁然于意逆之處俱有發明故今所注雖博采

羣賢要以三家爲本

字句同異固由轉寫多訛亦半係憑臆妄改今參取湯文清本李公煥本何孟春本焦弱侯本汲古閣舊本毛晉綠君亭本何義門所校宣和本擇善而存其義可兩存但云某本作某去取從違不敢專輒

首陽易水之思精衛刑天之詠其惓惓於故君舊國者情見乎辭述酒一篇湯東澗黃文煥十得六七尙有度詞隱語一經拈出疑滯胥通但注杜者泥於每飯不忘君之言致多迂曲又爲前人所識

故凡詞意本與時事無關，諸說必欲撻摭附會者，則在所不取。

知人論世，厥資年譜。王雪山、吳斗南兩家皆有論撰，然皆未嘗細考出處之年，又誤以上京爲京都，故于六載去還歸隔閼難通，又不知其時鎮京口者爲劉牢之，徒有仕桓仕裕疑團轆轤，今以晉宋二書參互攷定，疏通證明，自不煩言而解。

五孝傳四八目，本係假託，可以存而不論。今於卷首恭載四庫全書提要，俾承學之士不致以贗爲真，其四八目與正史間有同異，仍爲注明者，以究

係六朝人之書。爲後世類書之祖。足資考證也。

昭明本卷首有傳。卽其所自爲先生傳也。今諸本皆載昭明傳。然昭明實本沈約宋書。晉書南史亦皆踵宋書而作。故今備錄三史。其考正乖誤。則具年譜。運社高賢傳。雖小說。然所傳已舊。故旁及焉。何孟春毛晉於史傳之外。又雜采隆間軼事。以爲附錄。蓋凡先生釣游觴詠之處。無不動人流連。慨慕者。今續得若干條。並誌於後。猶何毛之意云。詩無達詁。古今善說詩者。無過孟子。小弁凱風。北山雲漢。不過片言。砉然以解。宋元以來。詩話興而

詩道晦連篇累幅強聒不休其實旨趣無關徒費
紙墨而已陶集自李公煥錄諸家總論於前嗣是
何孟春毛晉吳瞻泰增續益多然遽加刊削亦嫌
專輒故於卷末彙集一編未能免俗聊復效顰焉
爾

道光歲次己亥春月

安化陶澍識

金陵吳儀寫
惜陰書舍雕板

欽定四庫全書提要

陶淵明集八卷。晉陶潛撰。按北齊陽休之序錄潛集行世凡三本。一本八卷無序。一本六卷有序目。而編比顛亂。兼復闕少。一本爲蕭統所撰。亦八卷。而少五孝傳及四八目。四八目卽聖賢羣輔錄也。休之參合三本。定爲十卷。已非昭明之舊。又宋庠私記稱隋經籍志潛集九卷。又云梁有五卷錄一卷。唐志作五卷。庠時所行一爲蕭統八卷本。以文列詩前。一爲陽休之十卷本。其他又數十本。終不知何者爲是。晚乃得江左

舊本次第最有倫貫。今世所行卽庠稱江左本也。然昭明太子去潛世近。已不見五孝傳四八目。不以入集。陽休之何由續得。且五孝傳及四八目所引尙書自相矛盾。決不出於一手。當必依託之文。休之誤信而增之。以後諸本雖卷帙多少次第先後各有不同。其竄入僞作則同一轍。實自休之所編始。庠私記但疑八儒三墨二條之誤。亦考之不審矣。今四八目已經

睿鑒指示。灼知其贗。別著錄於子部類書而詳辨之。其五孝傳文義庸淺。決非潛作。旣與四八目一

時同出其贗亦不待言。今並刪除。惟編潛詩文。仍從昭明太子爲八卷。雖梁時舊本今不可考。而黜僞存真。庶幾猶爲近古焉。

聖賢羣輔錄二卷。舊附載陶潛集中。唐宋以來。相沿引用。承訛踵謬。莫悟其非。邇以編錄遺書。始蒙

睿鑒高深。斷爲僞託。臣等仰承

聖訓。詳悉推求。乃知今本潛集。爲北齊僕射陽休之。編休之序錄。稱其集先有兩本。一本六卷。編比顛亂。兼復闕少。蕭統所撰八卷。又少五孝傳及

四八目。今錄統所闕并序目等合爲十卷。是五
孝傳及四八目實休之所增。蕭統舊本無是也。
統序稱愛其文故加搜校。則八卷以外不應更
有佚篇。其爲晚出僞書已無疑義。且集中與子
儼等疏稱子夏爲孔子四友。而此錄四友乃爲
顏回子貢子路子張。如五孝傳引孝乎惟孝友
於兄弟之文。句讀尙從包咸。知未見古文尙書。
而此錄四岳一條乃引孔安國。其出兩手尤自
顯然。至書以聖賢羣輔錄爲名。而魯三桓鄭七
穆晉六卿魏四友。以及仕莽之唐林唐遵。叛晉

之王敦並列簡編名實相迓理乖風教亦決非
潛之所爲昔宋庠校正斯集僅知三墨八儒二
條爲後人所竄入而全書之贗竟不明潛之受
誣已逾千載今逢右文聖世得以辨別而表
章之使白璧無瑕流光奕葉是亦潛之至幸矣

靖節先生集諸本序錄

安化陶澍編輯

梁昭明太子陶淵明集序曰。夫自衒自媒者。士女之醜行。不伎不求者。明達之用心。是以聖人韜光。賢人遯世。其故何也。含德之至。莫踰於道。親己之切。無重於身。故道存而身安。道亡而身害。處百齡之內。居一世之中。倏忽比之白駒。寄遇謂之逆旅。宜乎與大塊而盈虛。隨中和而任放。豈能戚戚勞於憂畏。汲汲役於人間。齊謳趙女之娛。八珍九鼎之食。結駟連騎之榮。侈袂執圭之貴。樂旣樂矣。憂

亦隨之。何倚伏之難量。亦慶弔之相及。智者賢人。居之甚履薄冰。愚夫貪士競之若洩尾閭。玉之在山。以見珍而終破。蘭之生谷。雖無人而自芳。故莊周垂釣於濠。伯成躬耕於野。或貨海東之藥草。或紡江南之落毛。譬彼鵠雛。豈競鳶鷂之肉。猶斯雜縣。寧勞文仲之牲。至于子常甯喜之倫。蘇秦衛鞅之匹。死之而不疑。甘之而不悔。主父偃言。生不五鼎食。死則五鼎烹。卒如其言。豈不痛哉。又楚子觀周。受折於孫滿。霍侯驂乘。禍起於負芒。饕餮之徒。其流甚衆。唐堯四海之主。而有汾陽之心。子晉天

下之儲而有洛濱之志。輕之若脫屣。視之若鴻毛。而況於他人乎。是以至人達士。因以晦迹。或懷釐而謁帝。或被褐而負薪。鼓枻清潭。棄機漢曲。情不在於衆事。寄衆事以忘情者也。有疑陶淵明詩篇篇有酒。吾觀其意不在酒。亦寄酒爲迹者也。其文章不羣。辭采精拔。跌宕昭彰。獨超衆類。抑揚爽朗。莫之與京。橫素波而傍流。干青雲而直上。語時事則指而可想。論懷抱則曠而且真。加以貞志不休。安道苦節。不以躬耕爲恥。不以無財爲病。自非大賢篤志。與道汙隆。孰能如此乎。余素愛其文。不能

釋手。尙想其德。恨不同時。故加搜校。粗爲區目。白
璧微瑕。惟在閑情一賦。揚雄所謂勸百而風一者。
卒無風諫。何足搖其筆端。惜哉。無是可也。并麤點
定其傳。編之於錄。嘗謂有能觀淵明之文者。馳競
之情。遣鄙吝之意。祛貪夫可以廉。懦夫可以立。豈
止仁義可蹈。抑乃爵祿可辭。不必旁遊太華。遠求
柱史。此亦有助於風教也。

陽休之序錄曰。余覽陶潛之文。辭采雖未優。而往
往有奇絕異語。放逸之致。棲托仍高。其集先有兩
本行於世。一本八卷無序。一本六卷并序目。編比

顛亂兼復闕少。蕭統所撰八卷。合序目誄傳而少五孝傳及四八目。然編錄有體。次第可尋。余頗賞潛文。以爲三本不同。恐終致亡失。今錄統所闕并序目等合爲一帙十卷。以遺好事君子。

宋丞相私記曰。右集按隋經籍志。宋徵士陶潛集九卷。又云梁有五卷。錄一卷。唐志陶泉明集五卷。今官私所行本凡數種。與二志不同。有八卷者。卽梁昭明太子所撰。合序傳誄等在集前爲一卷。正集次之。亡其錄。有十卷者。卽陽僕射所撰。何孟春曰。陽休之字子烈。事北齊爲尙書左僕射。以好學文藻知名。與魏收同時。按吳氏西齋錄

有宋彭澤令陶潛集十卷疑卽此也其序并昭明
舊序誄傳等合爲一卷或題曰第一或題曰第十
或不署於集端別分四八目自甄表狀杜喬以下
爲第十卷然亦無錄余前後所得本僅數十家卒
不知何者爲是晚獲此本云出於江左舊書其次
第最有倫貫又五孝傳以下至四八目子注詳密
廣於他集惟篇後八儒三墨二條此似後人妄加
非陶公本意且四八目之末陶自爲說曰書籍所
載及故老所傳善惡聞於世者蓋盡於此卽知其
後無餘事矣

何孟春曰按四八目例每一事已陶
卽具疏所聞或經傳所出以結前意

此二條既無後說，益知贅附之妄。故今不著，輒別存之，以俟博聞者。廣平宋庠私記。

晁公武昭德讀書志曰：靖節先生集有數本，七卷者梁蕭統編，以序傳顏延之誄載卷首，十卷者北齊陽休之編，以五孝傳聖賢羣輔錄序傳誄分三卷，益之詩篇次差異。按隋經籍志：潛集九卷，又云梁有五卷，錄一卷。唐藝文志：潛集五卷，今本皆不與二志同。獨吳氏西齋目有潛集十卷，疑卽休之本也。休之本出宋庠家，云江左舊書，其次第最有倫貫，獨四八日後八儒三墨二條，疑後人妄加。

惲思悅書集後曰梁鍾記室嶸評先生之詩爲古今隱逸詩人之宗今觀其風致孤邁蹈厲淳源又非晉宋間作者所能造也昭明太子舊所纂錄且傳寫寢訛復多脫落後人雖加綜緝曾未見其完正愚嘗採拾衆本以事讐校詩賦傳記贊述雜文凡一百五十有一首洎四八目上下二篇重條理編次爲一十卷近永嘉周仲章太守枉駕東嶺示以宋朝宋丞相刊定之本於疑闕處甚有所補其陽侯射序錄宋丞相私記存於正集外以見前後記錄之不同也時皇宋治平三年五月望日思悅

書

文獻通考經籍考序錄

陶靖節集

鼂氏曰晉陶淵明元亮也。一名潛。潯陽人。蕭統云淵明字元亮。晉書云潛字元亮。宋書云潛字淵明。或云字深明。名元亮。按集中孟嘉傳與祭妹文皆自稱淵明。當從之。晉安帝末起爲州祭酒。桓元篡位。淵明自解而歸。州召主簿不就。躬耕自資。劉裕起兵討元誅之。爲鎮軍將軍。淵明叅其軍事。未幾遷建威叅軍。淵明見裕有異志。乃求爲彭澤令。去

職潛少有高趣好讀書不求甚解著五柳先生傳以自況世號靖節先生今集有數本七卷梁蕭統編以序傳顏延之誄載卷首十卷者北齊陽休之編以五孝傳聖賢羣輔錄序傳誄分三卷益之詩篇次差異按隋經籍志潛集九卷又云梁有五卷錄一卷唐藝文志潛集五卷今本皆不與二志同獨吳氏西齋目有潛集十卷疑卽休之本也休之本出宋庠家云江左舊書其次第最有倫貫獨四八目後八儒三墨二條疑後人妄加

東坡蘇氏曰吾於詩人無所好獨好淵明詩淵明

詩不多，然質而實，綺癯而實腴。自曹劉沈謝李杜諸人莫能及也。

朱子語錄曰：淵明詩，人皆說平淡。據某看他，自豪放，但豪放得來不覺耳。其露出本相者是詠荊軻一篇，平淡底人如何說得這樣言語出來。

西山真氏曰：予聞近世之評詩者，淵明之辭甚高，而其指則出於莊老。康節之辭若卑，而其指則原於六經。以余觀之，淵明之學正自經術中來，故形之於詩，有不可拚榮木之憂，逝水之歎也。貧士之詠，簞瓢之樂也。飲酒末章有曰：羲農去我久，舉世

少復眞汲汲魯中叟，彌縫使其淳。淵明之智及此，豈元虛之士可望邪？雖其遺榮辱，一得喪，真有曠達之風，細玩其辭，時亦悲涼感慨，非無意世事者。或者徒知義熙以後不著年號，爲恥事二姓之驗，而不知其睠睠王室，蓋有乃祖長沙公之心，獨以力不得爲，故肥遯以自絕，食薇飲水之言，銜木填海之喻，至深痛切，顧讀者弗之察耳。淵明之志若是，又豈毀彝倫而外名教者，可以同日語乎？

靖節年譜一卷 年譜辯證一卷 雜記一卷

陳氏曰：吳郡吳仁傑、斗南爲年譜，張演、季長辯證。

之。又雜記晉賢論靖節語。此蜀本也。卷末有陽休之宋庠序錄私記。又有治平三年思悅題。稱永嘉不知何人也。

靖節詩注四卷

贈端明殿學士番陽湯文清公漢撰以述酒一篇爲晉恭帝哀詞。蓋劉裕旣受禪。使張偉以毒酒酖帝。偉自飲而卒。乃令兵人踰垣進藥。帝不肯飲。兵人以被掩殺之。故哀帝詩託名述酒。其自序云。陶公詩精深高妙。測之愈遠。不可漫觀也。不事異代之節。與子房五世相韓之義同。旣不爲狙擊震動。

之舉。又時無漢祖者可託以行其志。故每寄情於
首陽易水之間。又以荆軻繼二疏三良而發咏。所
謂拊已有深懷。履運增慨然者。讀之亦可以深悲
其志也已。平生危行言孫。至述酒之作。始直吐忠
憤。然猶亂以庾辭。千載之下。讀者不省爲何語。是
此翁所深致意者。迄不得白於後世。尤可以使人
增歎而累歎也。余竊窺見其旨。因加箋釋。以表暴
其心事。及他篇有可以發明者。併著之。又按詩中
言本志少。說固窮多。夫惟忍於飢寒之苦。而後能
存節義之閑。西山之所以有餓夫也。世士貪榮祿

事豪侈而高談名義自方於古人余未之信也

按靖節集昭明所撰八卷合序目傳誄而無五
孝傳及四八目陽休之特取益之爲十卷隋經
籍志陶集梁有五卷錄一卷蓋錄卽八卷中之
目又別自單行其錄後亡故昭德讀書志只云
七卷今昭明本休之本皆不得見余所見自李
公煥以下凡十餘本卷數分併互有異同條繫
如右

李公煥本

以梁昭明序及傳冠首次采集諸家評陶爲總

論中分十卷前四卷詩五卷記辭傳述六卷賦
七卷五孝傳畫贊八卷疏祭文九卷十卷聖賢
羣輔錄末附錄顏延之詠陽休之序錄宋庠私
記僧思悅書後無名氏記何孟春曰世傳李公
煥本當是宋丞相所記江左舊書最有倫貫者
又曰陶詩舊有注者宋則湯伯紀元則詹若麟
輩而今不見其有傳者傳而刻者元則李公煥
本而不見其能爲述作家也

按明萬曆丁亥休陽程氏所梓卽李公煥本但
卷端不標箋注二字亦不載廬陵後學李公煥

集錄其總論中無東坡不取微生高一條而多
朱晦菴二條陸象山二條魏鶴山一條不知程
氏所見公煥本原是如此抑從別本刪增何燕
泉本總論則諸條悉具

按公煥本分十卷蓋用休之例也然休之增入
五孝傳四八目其卷當相似今若以八卷疏祭
文移於七卷五孝傳前五孝傳退居八卷則昭
文與休之編次俱可想像而得矣

又按公煥本標題稱箋注陶淵明集廬陵後學
李公煥集錄而不載時代何燕泉以公煥爲元

人未知何據識以俟考。

何孟春本

前四卷詩與李本同五卷賦辭六卷五柳先生傳孟府君傳五孝傳畫贊七卷述記疏祭文八卷九卷四八目十卷附錄顏延之誄昭明傳及序陽休之序錄宋庠私記僧思悅書後諸家總論。

自記是集蕭統陽休之輩或題陶淵明或題陶潛隋志作陶潛集唐志作陶泉明集以泉易淵唐爲神堯諱爾自趙宋來傳本題陶淵明集春

惡其斥賢者名也。從馬端臨經籍考稱靖節集云。集分卷數目。諸家不同。世傳李公煥本當是宋丞相所記。江左舊書所謂最倫貫者。春今考諸家。移卷六賦二篇併入卷五。移卷五五柳先生傳。孟府君傳同卷七。贊爲卷六。史述九章移桃源記前。加卷八。與子儼等疏上爲卷七。四八目舊自甄表狀杜喬以下分之爲卷九。卷十。今中分自鄧禹以下爲卷八。卷九減舊一卷。而誄傳序錄記跋諸爲陶作。洎先輩論議及陶有不可附篇注下者。錄次末簡。用足十卷之數。是

雖少有更置而倫貫依類尤覺得宜謹記於此
以備考焉正德戊寅陽月吉日燕泉何孟春子
元父記

按燕泉移置卷次自謂倫貫然昭明編錄原無
五孝傳四八目後人疑爲贋作今以五孝傳與
五柳先生孟府君傳同卷殊爲不倫也

汲古閣本

以昭明序冠卷首詩四卷惟無問來使一首餘
與諸本同五卷賦辭六卷記傳畫贊述七卷五
孝傳八卷疏祭文九卷十卷四八目十卷後以

陽休之序錄宋庠私記爲後序又別爲附錄二卷上卷顏延之誄昭明傳吳仁傑年譜下卷曾絃刑天說駱庭芝斜川辨諸家總論其年譜與吳瞻泰本不同者數處足資考證

焦竑本

詩四卷惟歸田園居無江淹擬作一首餘與諸本同五卷賦辭六卷記傳畫贊述七卷五孝傳八卷疏祭文附錄顏延之誄昭明傳序無四八目自敘言靖節先生微衷雅抱觸而成言昭明太子手葺爲編序而傳之歲久頗爲後人所亂

其改竄者什居二三竊疑其謬而絕無善本是
正頃友人偶以宋刻見遺無聖賢之目篇次正
與昭明舊本脗合中與今本異者不啻數十處
凡嚮所疑渙然冰釋此菽林之一快也吳君肅
卿語余陶集得此幸不爲妄庸所汨沒盍刻而
廣之余乃以授肅卿而道其始末如此肅卿名
汝紀新安人

按焦氏此本係宋刻然小注時引宋本作某豈
謂宋庠本耶又云八卷之數與昭明舊本合則
尤不然陽休之云蕭統所撰八卷合序目詠傳

而少五孝傳及四八目。宋庠私記云：隋經籍志宋徵士陶潛集九卷，又云梁有五卷錄一卷。唐志陶泉明集五卷，今官私所行本凡數種，與二志不同。有八卷者，卽梁昭明太子所撰，合序傳誄等在集前爲一卷，正集次之，亡其錄。晁氏昭德讀書志云：靖節先生集有數本，七卷者梁蕭統編，以序傳顏延之誄載卷首，是昭明所編。陶集正集止七卷，并序目誄傳爲八卷。後又以錄別爲一卷。故隋志云九卷，亡其錄，故仍爲八卷。錄卽目。宋晁所見八卷，但有序傳誄，不言目可

知也。今焦本若去其卷七五孝傳。庶有合於昭明卷數耳。

張溥漢魏百三名家本

通一卷。以賦辭疏記畫贊五孝傳孟府君傳五柳先生傳讀史述祭文詩爲次。無四八目題詞。曰古來詠陶之作。惟顏清臣稱最相知。謂其公相子孫。北牕高臥。永初以後。題詩甲子。志猶張良。思報韓龔。勝恥事新也。恩深哉。非清臣孰能爲此言乎。吳幼清亦云。元亮述酒荆軻等作。欲爲漢相孔明而無其資。嗚呼。此亦知陶者。其遭

時何相似也。君臣大義，蒙難愈明。仕則爲清臣，不仕則爲元亮。舍此則華歆、傅亮、攘袂勸進三尺童子，咸羞稱之。此昔人所以高楊鐵崖而卑許平仲也。感士類子長之倜儻，閑情同宋玉之好色，告子似康成之誡書，自祭若右軍之誓墓。孝贊補經傳記近史，陶文雅兼衆體，豈獨以詩絕哉。眞西山云：淵明之作，宜自爲一編，附三百篇楚辭之後，爲詩根本準，則是最得之。莫謂宋人無知詩者也。陶刻頗多，而學者多善焦太史所訂宋本，故仍其篇。

按張本字句悉用焦本，但易其篇次耳。

張爾公本

詩四卷，刪四時一首，謂氣格不似淵明，又刪聯句一首，謂淺陋不足述，餘與諸本同。五卷以記辭傳述賦爲次，六卷疏祭文，其五孝傳四，八目悉刪不錄，扇上畫贊亦刪，謂其以養氣浩然子於陵仲子，而極贊其至，與聖賢所論相柄鑿，故併刪之。

毛晉綠君亭本

以詩一百五十八章爲一卷，文十七篇爲一卷。

四八目爲一卷詩之歸園田居江淹擬作問來
使四時聯句四八目之八儒三墨皆不載正集
另見雜附中其諸家之評論則前有總評章評
字句之異同則後有參疑詳焉

何焯校正本

云以宋宣和棗木板原本校對者按胡仔茗溪
漁隱叢話曰余家藏靖節文集乃宣和王寅王
仲良厚之知信陽日所刻字大尤便老眼字畫
乃學東坡書亦臻其妙殊爲可愛不知此板兵
火之餘今尙存否厚之有後序云陶集世行數

本互有舛謬。今詳加審訂。其本無二意。不必俱存。如亂一作乱。禮一作礼。游一作遊。余一作子者。復有字畫近似。傳寫相襲。失於考究。如以庫鈞爲庾鈞。丙曼容爲丙曼客。八及爲八友者。凡所改正二百二十有六。義門所謂宣和本。當卽此本也。

以上諸本詩文並載。其專說詩者所見亦有數本。

湯東礪本

自序。陶公詩精深高妙。測之愈遠。不可漫觀也。

不事異代之節，與子房五世相韓之義同。旣不爲狙擊震動之舉，又時無漢祖者可託以行其志，故每寄情於首陽易水之間，又以荆軻繼二疎三良而發詠，所謂撫已有深懷，履運增慨然。讀之亦可以深悲其志也已。先生危行遜言，至述酒之作，始直吐忠憤，然猶亂以廋詞，千載之下，讀者不省爲何語，是此翁所深致意者，迄不得白於後世，尤可以使人增欷而累歎也。余偶窺見其指，因加箋釋，以表暴其心事。及他篇有可發明者，亦併著之，文字不多，乃令繕寫模傳。

與好古通微之士共商略焉。又按詩中言本志少，說固窮多，夫惟忍於飢寒之苦，而後能存節義之閑。西山之所以有餓夫也，世士貪榮祿，事豪侈，而高談名義，自方於古之人，余未之信也。淳祐初元九月九日，鄱陽湯漢敬書。

吳騫跋曰：南宋鄱陽湯文清公注陶靖節詩四卷，馬貴與文獻通考極稱之，所謂述酒詩乃哀零陵而作，其微旨雖濫觴於韓子蒼，至文清反覆研討而益暢其說，真可謂彭澤異代之知己矣。此書世鮮傳本，歲辛丑，吾友鮑君以文游吳

趨得之歸舟枉道過余小桐溪山館出以見示
楮墨精好古香襲人誠宋槧佳本也昔毛斧季
前輩晚年嘗以藏書售潘稼堂太史有宋刻陶
集斧季自題目下曰此集與世本夔然不同如
桃花源記聞之欣然規往時本率譌規作親今
觀是集始知斧季之言爲不謬又擬古詩聞有
田子泰流俗本多譌作田子春惟此作子泰與
魏志符其他佳處尤不勝更僕數注中間有引
宋本者鮑君據吳氏西齋書目及僧思悅陶氏
序以爲湯氏蓋指宋元獻刊定之本因勸予重

雕以公同好，文清人品雅，爲真西山、趙南泉諸公所推。尤明於易，城復于隍，其命亂也。王伯厚困學紀聞嘗取之。餘詳宋史本傳。乾隆五十年歲次旃蒙大荒落，小重陽日，海昌吳騫識。

按東礪本，何孟春云：今不見其全書，此本乃吳騫拜經樓以宋本重雕者。惟詩四卷，文但錄桃花源記，以有詩也；錄歸去來辭，以詩類也；其歸園田居、江淹擬作及問來使，晚唐人作，舊誤入者，皆別出附於集末。又雜詩、嫋嫋松標崖一首，亦附集末。云東坡和陶無此篇。

黃文煥陶詩析義本

詩四卷與諸本同。惟刪歸園田居江淹擬作及四時詩。而以桃花源詩列於卷末聯句之前。蓋用東坡本例也。但不錄歸去來辭與湯異。

吳瞻泰陶詩彙注本

以昭明傳吳仁傑王質兩家年譜冠首。詩四卷刪去歸園田居江淹擬作及問來使四時三首。而以桃花源詩列於卷末。并附讀史述九章。謂九章原不列詩集內。然語以韻行與詩不甚遠。且九章之內發抒忠憤爲多。尤淵明一生大節。

正猶屈子之九歌也。附於詩後，似不嫌創云。

蔣薰本

詩四卷與諸本同。惟刪四時一首，而以桃花源詩列於卷末聯句之前。歸去來辭并讀史述九章次其後焉。

以上所見合十二本。卷數之分併，字句之同異，今皆擇善而從。惟以五孝傳移爲第八卷，使與四八目相次。後之覽者，庶知前七卷雖非昭明舊第，然其編比大槩可想。後三卷則陽休之附益，而眞贋亦無難辨識矣。其未見諸本，仍錄於

右

無名氏集後記曰靖節先生江左偉人世高其節先儒謂其最善任真方其爲貧也則求爲縣令仕不得志也則挂冠而歸此所以爲淵明設其詩文不工猶當敬愛況如渾金璞玉前賢固有定論耶僕近得先生集乃羣賢所校定者因鋟于木以傳不朽云紹興十年十一月日記何孟春曰淵明集有記者云云不著名氏世本李公煥注此不知公煥之所載者誰與

陳振孫直齋書錄解題靖節年譜一卷辨證一卷雜記一卷解題曰吳郡吳仁傑斗南爲年譜張續

季長辨證之。又雜記昔賢論靖節語。此蜀本也。卷末有陽休之序錄。宋庠私記。又有治平三年思悅題。稱永嘉不知何人也。

季長辨證本今未見

吳澄詹若麟淵明集補注序曰。予嘗謂楚之屈大夫。韓之張司徒。漢之諸葛丞相。晉之陶徵士。是四君子者。其制行也。不同。其遭時也。不同。而其心一也。一者何。明君臣之義而已。欲爲韓而斃呂。殄秦者。子房也。欲爲漢而誅曹。殄魏者。孔明也。雖未能盡如其心焉。然亦略得伸其志願矣。靈均逆睹讒臣之喪國。淵明坐視強臣之移國。而俱莫如之何。

也。畧伸志願者，其事業見於世，莫如之何者，將沒世而莫之知，則不得不託之空言以洩忠憤。此予所以每讀屈辭、陶詩而爲之流涕太息也。屈子之辭，非藉朱子之注，人亦未能洞識其心。陶子之詩，悟者尤鮮。其泊然沖淡而甘無爲者，安命分也。其慨然感發而欲有爲者，表志願也。近世惟東澗湯氏稍稍窺探其一二。吾鄉詹麒若麟，因湯所注而廣之，考其時，考其地，原其序，以推其志意。於是屈陶二子之心，粲然暴白於千載之下。若麟之功，蓋不減朱子也。嗚呼，陶子無昭烈之可輔以圖存，無

高皇之可倚以復讐，無可以伸其志願而寓於詩，
使後之觀者又咏昧焉，豈不重可悲也哉！屈子不
忍見楚之亡而先死，陶子不幸見晉之亡而後死，
死之先後異爾，易地則皆然，其亦重可哀已夫。
何孟春曰：若麟補注未見，據吳此序，其書必有可取。

靖節先生集 誄傳雜識

陶徵士誄

顏延之

夫璿玉致美，不爲池皇之寶；桂椒信芳，而非園林之實。豈其樂深而好遠哉？蓋云殊性而已。故無足而至者，物之藉也；隨踵而立者，人之薄也。若乃巢由之抗行，夷皓之峻節，故已。父老堯禹，錙銖周漢，而縣世寢遠，光靈不屬。至使菁華隱沒，芳流歇絕，不亦惜乎？雖今之作者，人自爲量，而首路善本作首路五同塵，輟塗殊軌者，多矣。豈所以昭末景汎臣作道餘波乎？文選無有晉徵士潯陽陶淵明，南嶽之幽

居者也。弱不好弄，長實素心。學非稱師，文取指達。

在衆不失其寡，處言愈見其默。少而貧苦，一作病居

無僕妾，井曰弗任。藜藿不給，母老子幼，就養勤匱。

遠惟田生致親之義，追一作近悟毛子捧檄之懷。初

辭州府三命，後爲彭澤令。道不偶物，棄官從好。遂

乃解體世紛，結志區外。定迹深棲，於是乎遠。一作遂

灌畦鬻蔬，爲供魚菽之祭。織絢緯蕭，以充糧粒之

費。心好異書，性樂酒德。簡棄煩促，就成省曠。殆所

謂國爵屏貴，家人忘貧者與。有詔徵著作郎，稱疾

不赴。一無稱疾二字春秋六十有三。文選作春秋若干元嘉四年

月日卒於潯陽縣柴桑里

一作之某里

近識悲悼遠士

傷情冥默福應嗚呼淑貞夫實以誄華名由諡高苟允德義貴賤何算焉若其寬樂令終之美好廉克己之操有合諡典無愆前志故詢諸友好宜諡曰靖節徵士其詞曰物尙孤生人固介立豈伊時邁曷云世及嗟乎若士望古遙集韜此洪族蔑彼名級睦親之行至自非敦然諾之信重於布言廉深簡潔貞夷粹溫而能峻博而不繁依世尙同詭時則異有一於此兩非默置豈若夫子因心違

事

一作達理

畏榮好古薄身厚志世霸虛禮州壤推風

孝惟義養道必懷邦人之秉彝

考異何云人不隘字避諱改

不隘

不恭爵同下士祿等上農度量難鈞進退可限長卿棄官稚賓自免子之悟之何悟之辨賦辭歸來高蹈獨善亦既超曠無適非心汲流舊巘葺宇家林晨煙暮靄春煦秋陰陳書綴卷置酒絃琴居備勤儉躬兼貧病人否其憂子然其命隱約就閑遷延辭聘非直也明是惟道性糾纏幹流冥漠報施孰云與仁實疑明智謂天益高胡譽斯義履信曷憑思順何寘年在中身疾維疢疾視化如歸臨凶若吉藥劑弗嘗禱祀非恤僚幽告終懷和長畢鳴

呼哀哉，敬述靖節式遵遺占，存不願豐，沒無求贍，
省訃却賻，輕哀薄斂，遭壤以穿，旋葬而窆，嗚呼哀
哉！深心追往，遠情逐化，自爾介居，及我多暇，伊好
之治，接閭鄰舍，宵盤晝憩，非舟非駕，念昔宴私，舉
觴相誨，獨正者危，至方則閔，哲人卷舒，布在前載，
取鑒不遠，吾規子佩，爾實愀然，中言而發，違衆速
尤，迕風先歷，身才非實，榮聲有歇，戲一作徽永矣，
誰箴余闕，嗚呼哀哉！仁焉而終，智焉而斃，黔婁既
沒，展禽亦逝，其在先生，同塵往世，旌此靖節，加彼
康惠，嗚呼哀哉！

宋書隱逸傳

陶潛字淵明。或云淵明字元亮。潯陽柴桑人也。曾祖侃。晉大司馬。潛少有高趣。嘗著五柳先生傳以自況。文載本集時人謂之實錄。親老家貧。起爲州祭酒。不堪吏職。少日自解歸。州召主簿不就。躬耕自資。遂抱羸疾。復爲鎮軍建威參軍。謂親朋曰。聊欲絃歌以爲三徑之資可乎。執事者聞之。以爲彭澤令。公田悉令種秫稻。妻子固請種杭。仍使二頃五十畝種秫。五十畝種杭。郡遣督郵至縣。吏白應束帶見之。潛歎曰。我不能爲五斗米折腰向鄉里小人。

卽日解印綬去職賦歸去來

文載本集

義熙末徵著作

佐郎不就江州刺史王宏欲識之不能致也潛嘗往廬山宏令潛故人龐通之齎酒具於半道栗里要之潛有脚疾使一門生二兒輦籃輿旣至欣然便共飲酌俄頃宏至亦無忤也先是顏延之爲劉柳後軍功曹在潯陽與潛情款後爲始安郡經過日日造潛每往必酣飲致醉臨去留二萬錢與潛潛悉送酒家稍就取酒嘗九月九日無酒出宅邊菊叢中坐久值宏送酒卽便就酌醉而後歸潛不解音聲而蓄素琴一張無絃每有酒適輒撫弄以

寄其意貴賤造之者有酒輒設潛若先醉便語客
我醉欲眠卿可去其真率如此郡將侯潛值其酒
熟取頭上葛巾漉酒畢還復著之潛弱年薄宦不
潔去就之跡自以曾祖晉世宰輔恥復屈身異代
自高祖王業漸隆不復肯仕所著文章皆題其年
月義熙以前則書晉氏年號自永初以來唯云甲
子而已與子書以言其志并爲訓戒與子疏又爲
命子詩以貽之詩載本集潛元嘉四年卒時年六十三

陶淵明傳

蕭統

陶淵明字元亮或云潛字淵明尋陽柴桑人也曾

祖侃。晉大司馬。淵明少有高趣。博學善屬文。穎脫不羣。任真自得。嘗著五柳先生傳以自況。時人謂之實錄。親老家貧。起爲州祭酒。不堪吏職。少日自解歸。州召主簿不就。躬耕自資。遂抱羸疾。江州刺史檀道濟往候之。偃臥瘠餒有日矣。道濟謂曰。賢者處世。天下無道則隱。有道則至。今子生文明之世。奈何自苦如此。對曰。潛也何敢望賢。志不及也。道濟饋以梁肉。麾而去之。後爲鎮軍建威參軍。謂親朋曰。聊欲絃歌以爲三徑之資可乎。執事者聞之。以爲彭澤令。不以家累自隨。送一力給其子。書

曰汝旦夕之費自給爲難今遣此力助汝薪水之勞此亦人子也可善遇之公田悉令吏種秫曰吾常得醉于酒足矣妻子固請種秔乃使二頃五十畝種秫五十畝種秔歲終會郡遣督郵至縣吏請曰應束帶見之淵明歎曰我豈能爲五斗米折腰向鄉里小兒卽日解綬去職賦歸去來徵著作郎不就江州刺史王宏欲識之不能致也淵明嘗往廬山宏命淵明故人龐通之齎酒具於半道栗里之間邀之淵明有腳疾使一門生二兒舁籃輿旣至欣然便共飲酌俄頃宏至亦無忤也先是顏延

之爲劉柳後軍功曹在潯陽與淵明情款後爲始

安郡經過潯陽日造淵明飲焉每往必酣飲致醉

宏欲邀延之坐一作赴坐彌日不得延之臨去留二萬

錢與淵明淵明悉遣送酒家稍就取酒嘗九月九

日出宅邊菊叢中坐久之滿手把菊忽值宏送酒

至卽便就酌醉而歸淵明不解音律而蓄無絃琴

一作無絃素琴一張每酒適輒撫弄以寄其意貴賤造之

者有酒輒設淵明若先醉便語客我醉欲眠卿可

去其真率如此郡將常候之值其釀熟取頭上葛

巾漉酒漉畢還復著之時周續之入廬山事釋惠

遠彭城劉遺民亦遜迹匡山淵明又不應徵命謂之潯陽三隱後刺史檀韶苦請續之出州與學士祖企謝景夷三人共在城北講禮加以講校所住公廨近於馬隊是故淵明示其詩云周生述孔業祖謝響然臻馬隊非講肆校書亦已勤其妻翟氏亦能安勤苦與其同志自以曾祖晉世宰輔恥復屈身後代自宋高祖王業漸隆不復肯仕元嘉四年將復徵命會卒時年六十三世號靖節先生

晉書隱逸傳

陶潛字元亮大司馬侃之曾孫也祖茂武昌太守

潛少懷高尚博學善屬文穎脫不羈任真自得爲鄉鄰之所貴嘗著五柳先生傳以自況時人謂之寶錄以親老家貧起爲州祭酒不堪吏職少日自解歸州召主簿不就躬耕自資遂抱羸疾復爲鎮軍建威參軍謂親朋曰聊欲絃歌以爲三徑之資可乎執事者聞之以爲彭澤令在縣公田悉令種秫穀曰令吾常醉於酒足矣妻子固請種秔乃使一頃五十畝種秫五十畝種秔素簡貴不私事上官郡遣督郵至縣吏白應束帶見之潛歎曰吾不能爲五斗米折腰拳拳事鄉里小人邪義熙二年

解印去縣。乃賦歸去來。頃之徵著作郎。不就。既絕
州郡覬謁。其鄉親張野及周旋人羊松齡裴遵等
或有酒邀之。或要之共至酒坐。雖不識主人。亦欣
然無忤。酣醉便反。未嘗有所造詣。所之唯至田舍
及廬山游觀而已。刺史王宏以元熙中歸州。甚欽
遲之。後自造焉。潛稱疾不見。既而語人曰。我性不
狎世。因疾守閑。甚非潔志。慕聲豈敢。以王公紆軫
爲榮邪。夫謬以不賢。此劉公幹所以招謗。君子其
罪不細也。宏每令人候之。密知當往廬山。乃遣其
故人龐通之等齎酒先於半道邀之。潛既遇酒。便

引酌野亭欣然忘進宏乃出與相見遂歡宴窮日
潛無履宏顧左右爲之造履左右請履度潛便於
坐申腳令度焉宏要之還州問其所乘答云素有
腳疾向乘籃輿亦足自反乃令一門生二兒共輦
之至州而言笑賞適不覺其有羨於華軒也宏後
欲見輒於林澤間候之至於酒米乏絕亦時相贍
其親朋好事或載酒肴而往潛亦無所辭焉每一
醉則大適融然又不營生業家務悉委之兒僕未
嘗有喜愠之色惟遇酒則飲時或無酒亦雅詠不
輟嘗言夏月虛閣高臥北窗之下清風颭至自謂

義皇上人性不解音而畜素琴一張絃徽不具每
朋酒之會則撫而和之曰但識琴中趣何勞絃上
聲以宋元嘉中卒時年六十三所有文集并行於
世

南史隱逸傳

陶潛字淵明或云字深明名元亮尋陽柴桑人晉
大司馬侃之曾孫也少有高趣宅邊有五柳樹故
嘗著五柳先生傳蓋以自況時人謂之實錄親老
家貧起爲州祭酒不堪吏職少日自解而歸州召
主簿不就躬耕自資遂抱羸疾江州刺史檀道濟

往侯之。偃臥瘠餒有日矣。道濟謂曰：夫賢者處世，天下無道則隱，有道則至。今子生文明之世，奈何自苦如此？對曰：潛也何敢望賢，志不及也。道濟饋以梁肉，麾而去之。後爲鎮軍建威參軍。謂親朋曰：聊欲絃歌以爲三徑之資可乎？執事者聞之，以爲彭澤令不以家累自隨，送一力給其子。書曰：汝旦夕之費，自給爲難。今遣此力，助汝薪水之勞，此亦人子也，可善遇之。公田悉令吏種秫稻，妻子固請種粳，乃使二頃五十畝種秫，五十畝種粳。郡遣督郵至縣，吏白應束帶見之。潛歎曰：我不能爲五斗

米折腰向鄉里小人卽日解印綬去職賦歸去來以遂其志義熙末徵爲著作佐郎不就江州刺史王宏欲識之不能致也潛嘗往廬山宏令潛故人龐通之齎酒於半道栗里要之潛有脚疾使一門生二兒舉籃輦及至欣然便共飲酌俄頃宏至亦無忤也先是顏延之爲劉柳後軍功曹在尋陽與潛情款後爲始安郡經過潛每往必酣飲致醉宏欲邀延之一坐彌月不得延之臨去留二萬錢與潛潛悉送酒家稍就取酒嘗九月九日無酒出宅邊菊叢中坐久之逢宏送酒至卽便就酌醉而後

歸潛不解音聲而畜素琴一張每有酒適輒撫弄以寄其意貴賤造之者有酒輒設潛若先醉便語客我醉欲眠卿可去其真率如此郡將候潛逢其酒熟取頭上葛巾漉酒畢還復著之潛弱年薄宦不潔去就之迹自以曾祖晉世宰輔恥復屈身後代自宋武帝王業漸隆不復肯仕所著文章皆題其年月義熙以前明書晉氏年號自永初以來唯云甲子而已與子書以言其志并爲訓戒又爲命子詩以貽之元嘉四年將復徵命會卒世號靖節先生其妻翟氏志趣亦同能安苦節夫耕於前妻

鉏於後云。

蓮社高賢傳

陶潛字淵明。晉大司馬侃之曾孫。少懷高尚。著五柳先生傳以自況。時以爲實錄。初爲建威參軍。謂親朋曰。聊欲絃歌爲三徑之資。執事者聞之。以爲彭澤令。郡遣督郵至。縣吏白應束帶見之。潛歎曰。吾不能爲五斗米折腰。拳拳事鄉里小兒耶。解印去縣。乃賦歸去來。及宋受禪。自以晉世宰輔之後。恥復屈身異代。居潯陽柴桑。與周續之。劉遺民。並不應辟命。世號潯陽三隱。嘗言夏月虛閒。高臥北

窗之下清風颯至自謂羲皇上人性不解音畜素琴一張絃徽不具每朋酒之會則撫而叩之曰但識琴中趣何勞絃上聲常往來廬山使一門生二兒舁籃輿以行時遠法師與諸賢結蓮社以書招淵明淵明曰若許飲則往許之遂造焉忽攢眉而去宋元嘉四年卒世號靖節先生

附錄雜識

晉中興書載顏延之爲始安郡道經潯陽常飲淵明舍自晨達昏及淵明卒延之爲誄極其思致

續晉陽秋云江州刺史王宏造淵明無履宏從人脫履以給之宏語左右爲彭澤作履左右請履度淵明於衆坐伸腳及履至著而不疑

廬山記遠法師居廬阜三十餘年影不出山跡不入俗送客過虎溪虎輒鳴號昔陶元亮居栗里山南陸修靜亦有道之士遠師嘗送此二人與語道合不覺過之因相與大笑今世傳三笑圖

廬阜雜記遠師結白蓮社以書招淵明陶曰弟子嗜酒若許飲卽往矣遠許之遂造焉因勉令

入社陶攢眉而去。

杜詩注陶淵明聞遠公議論謂人曰令人頗發深省。

雲仙散錄載淵明別傳云淵明嘗聞田水聲倚杖久聽歎曰秔稻已秀翠色染人將剖胸襟一洗荆棘此水過吾師丈人矣。

又云陶淵明得太守送酒多以春秔水雜投之曰少延清歡。

又云淵明日用銅鉢煮粥爲二食具遇發火則

再拜曰非有是火何以充腹。

何孟春曰淵明別傳今無聞春謹採

所載於散錄者以附傳後洪容齋嘗謂世傳雲
仙散錄等書淺妄絕可笑而頗能疑誤後生趙
與時賓退錄曰散錄引書百餘種而其造語盡
倣世說若集諸家言語豈應一律實本容齋之
說

以上何孟春附錄原採

顏之推家訓劉孝綽當時既有重名無所與讓
唯服謝朓常以謝詩置几案間動靜輒諷味簡
文愛陶淵明文亦復如此

文中子或問陶元亮子曰放人也歸去來有避
地之心焉五柳先生傳則幾于閉關矣

李元中蓮社圖記遠公結社廬山時陳郡謝靈

運以才自負少所推與及來社中見遠師心悅誠服乃爲開池種白蓮求預淨社師以其心亂拒而不納陶潛時棄官居栗里每來社中或時纔至便攢眉迴去遠師愛之欲留不可道士陸修靜居簡寂觀亦常來社中與遠相善遠自居東林足不越虎溪一日送陸道士忽行過溪相持而笑又常令人沽酒引淵明來故詩人有愛陶長官醉兀兀送陸道士行遲遲沽酒過溪俱破戒彼何人斯師如斯又云陶令醉多招不得謝公心亂去還來者皆其事也

江西通志淵明故居凡三處一在瑞州新昌縣東二十五里圖經云陶公始家宜豐後徙柴桑宜豐今新昌也一在南康府城西七里爲玉京山亦名上京名勝志云陶詩疇昔我上京卽此一在九江府西南九十里柴桑山名勝志云陶潛家于柴桑卽今之樊城鄉也去宅北三里許有靖節墓唐白居易有訪陶公舊宅詩合三說攷之當以此爲正也

桑喬廬山紀事上京山當大湖濱一峰蒼秀彭蠡東西數百里雲山煙水浩淼縈帶皆列几席

間奇絕不可名狀。陶淵明嘗居之。淵明詩疇昔
家上京。注云南康志近城五里地名上京有淵
明故居。

王禕經行記陶靖節故居其地栗里也地屬星
子縣而星子在晉爲彭澤縣按史靖節爲彭澤
令督郵行縣吏白當束帶見之靖節不肯折腰
小兒遂解官賦歸去來辭而歸義熙三年也是
時劉裕實殺殷仲文將移晉祚陶氏世爲晉臣
義不事二姓故託爲之辭以去耳梁昭明謂恥
復屈身異代要爲得其心夫豈以一督郵爲此

悻悻乎

困學紀聞陶公栗里前賢題詠獨顏魯公一篇
令人感慨今攷魯公詩云張良思報韓龔勝恥
事新狙擊苦不就舍生悲拖紳嗚呼陶淵明奕
葉爲晉臣自以公相後每懷宗國屯題詩庚子
歲自謂羲皇人手持山海經頭戴漉酒巾興與
孤雲遠辨隨還鳥泯見廬山記集不載朱子跋
云顏文忠公栗里詩見陳令舉廬山記而不得
其全篇雖然讀之者亦足以識二公之心而著
於君臣之義矣栗里在今南康軍西北五十里

谷中有巨石相傳是陶公醉眠處予嘗往遊而
悲之爲作歸去來館於其側歲時勸相間一至
焉俯仰林泉舉酒屬客蓋未嘗不賦是詩也
桑喬廬山紀事栗里者陶淵明故里也其地在
虎爪崖下

尋陽記栗里今有平石如砥縱橫丈餘相傳靖
節先生醉臥其上在廬山南

王禕經行記過醉石觀陶靖節故居其地栗里
也觀已廢惟有大石亘澗中石上隱然有人臥
形相傳靖節醉臥此石上也

圖書集成南康府部醉石在星子縣濯纓池下
谷中高三四尺亦謂之砥柱石元亮飲酒醉臥
其上

陶默仰止錄栗里原當澗有石從廣丈餘其平
如砥淵明每醉輒坐臥其上朱文公詩及此逢
醉石謂言公所眠陳聖俞云是非分付千鍾酒
日月消磨一醉中今其傍有醉石菴

太平寰宇記五柳館在栖隱寺側五柳先生之
舊宅也

仰止錄五柳館先生門種五柳也湖口沿西三

十步。元主簿馮克敏復構五柳堂。今夷爲民居矣。

明一統志。湖口縣東三十里有翫月臺。晉陶潛爲彭澤令時築。以翫月。臺南有洗墨池。潛所鑿。以滌硯者。

圖書集成九江府部。洗墨池。在湖口縣南三十里。彭澤鄉。陶元亮爲令時滌筆墨處。一嘯亭。綺練亭。翫月臺。俱在彭澤鄉。世傳陶元亮宰縣時築。

江西通志。九江府城西南九十里。有王宏岡。卽

白衣人送酒地也。

仰止錄菊所在東流縣治後淵明解印日常處其中藝菊卽舊彭澤地也書崗在豫章安福縣南四十里怪石層聳其嶺有平石名淵明讀書臺又曰書崗也九曲池在湖口縣南三十里有池云淵明所穿與陸修靜周續之三人聚講處也今改爲三學寺。

毛晉綠君亭陶集雜附靖節祠一在柴桑山下
一在南康府學東一在九江府治東一在彭澤
縣治東又一在縣南一在瑞州府城南一在新

昌縣之南山一在湖口縣三學寺前或專祠或
合祠皆古今名賢遐淑道風流範來學故雖郡
邑之沿革非一而先生之祠則易代而彌新也
圖書集成九江府部靖節祠初在三學寺旁有
望月臺元時縣尹孫文震至寺見望月臺遺蹟
乃靖節讀書地捐俸建祠於上後於三學寺後
建祠塑先生及陸靜修周續之遺像於中名三
賢祠後圯國朝順治中重建地有望月臺洗
墨池流觴曲水遺跡古松蒼蔚爲湖口八景之

元吳澄湖口縣靖節先生祠堂記曰晉靖節陶
先生家潯陽之柴桑嘗爲彭澤令後析彭澤創
湖口縣湖口亦彭澤也故其境內往往有靖節
遺跡孫侯文震宰湖口因行其鄉至三學寺民
間相傳以爲靖節讀書之地旁有望月臺舊基
猶存乃出私錢屋於臺基之上且就縣學東偏
建祠堂三間以祀先生竊惟靖節先生高志遠
識超越古今而設施不少槩見其令彭澤也不
過一時收伯辟舉相授俾得公田之利以自養
如古人不得已而爲祿者爾非受天子命而仕

也。曾幾何時，不肯屈於督郵而去，充此志節。異時詎肯忍恥於二姓哉？觀述酒荆軻等作，殆欲爲漢相孔明之事而無其資。責子有詩，與子有疏，志趣之同，苦樂之安，一家父子夫婦又如此。夫人道三綱爲首，先生一身而三綱舉，無愧焉。忘言於真意，委運於大化，則幾於同道矣。誰謂漢魏以降而有斯人者乎？噫，先生未易知也。後人於言語文字間窺覘其髣髴而已。然先生非有名位顯於時，非有功業著於後，而千載之下使人眷眷不忘，其何以得此於人哉？子於孫侯

之爲惡乎而不喜談樂道之也侯燕人所至有
廉能聲

仰止錄湖口大嶺山在彭澤鄉東去縣二十里
卽漢彭澤舊治有靖節祠元吳澄作記南康星
子縣亦有祠城東一里祠前有神運石石色深
黑旁有大指痕文理隱然瑞州亦有祠宋文丞
相天祥建

新昌縣祠縣東二十里義鈞鄉鄉人多陶姓於
其南立祠

桑喬廬山紀事靖節墓在面陽山北麓鹿子坂

在楚城鄉桃花尖山西去靖節墓三四里其地有淵明故宅

圖書集成陶靖節墓在星子縣北二十五里明正德七年提學李夢陽清出墓於面陽山置田以備祭祀命其後瓊領之以陶時亨補郡學生員至今代有祀生墓西南爲靖節書院

廬山志李夢陽曰淵明墓之失也越百餘年無尋焉予旣得其山并田遂遷諸竊據而葬者數塚而封識之然仍疑焉夫淵明白祭文曰不封不樹豈其時真不封不樹以攷竊據而葬者耶

又曰予既得墓山封識之矣又得其故屋祠址
田令其裔老人墳領業焉然其山并田德化縣
屬而老人瓊星子民也會九江陶亨來言淵明
裔亨固少年粗知字義者於是使爲郡學生實
欲久陶墓云

以上新增